

Mensahe 3

Mausa sa Kalag aron Makapahimulos ni Cristo sa Paghunahuna sa Usa ka Butang, sa Pagkausang ni Cristo sa Iyang Mga Bahin sa Sulod, ug sa Pagpabuhay Nato sa Dios sa Sulod Nato sa Pagbuot ug sa Pagbuhay alang sa Iyang Gikahimut-an

Basahong Kasulatan: Fil. 1:4, 8, 18, 25, 27; 2:2, 12-13, 17-18, 28-29; 3:1; 4:1, 4, 10, 15-16

- I. Sa hugot gyod, dili lang basahon sa pagsinati kang Cristo ang Filipos kondili sa pagpahimulos sab kang Cristo; labi gyong naa sa atong espiritu ang pagsinati nato ni Cristo, apan naa sa atong kalag (sa atong hunahuna, pagbati, ug pagbuot) ang pagpahimulos nato ni Cristo:**
- A. Kay kalabot man ang Filipos sa pagsinati ug pagpahimulos ni Cristo, nga mongsangpot sa kalipay, basahon kini nga napuno sa kalipay ug pagkalipay—1:4, 18, 25; 2:2, 17-18, 28-29; 3:1; 4:1, 4.
 - B. Nakig-ambitay ang mga balaan sa Filipos ngadto sa pagpauswag sa ebanghelyo, pinaagi sa pagpangalagad ni apostol Pablo; naglakip kining pagsalmota sa pagamot nilag salapi alang sa apostol—vv. 10, 15-16:
 - 1. Ang kinabuhing nagsinati ug nagpahimulos ni Cristo kinabuhing nagpauswag sa ebanghelyo, kinabuhing nagsangyaw sa ebanghelyo, nga dili tinagsa kondili hiniusa; labi tang makig-ambitay sa pagpauswag sa ebanghelyo, labi sab nga Cristo ang masinati ug mapahimuslan nato; mopatay kini sa atong kaugalingon, ambisyon, gusto, ug pagpili.
 - 2. Mamulong ba ta o maghilom, pagsangyaw gyod unta nato ni Cristo ang atong kinabuhi, pagkinabuhi, pagkamao, ug tibuok pagkatawo—1:20; 4:22; itandi sa 2 Cor. 3:3.
 - C. Gisugo ta ni Pablo nga maggawi “nga angay gyod sa ebanghelyo ni Cristo,” nga mao ang “lig-on [nga] nagbarog sa usa ka espiritu, usang kalag nga niduyog sa pakigbisog uban sa pagtuo sa ebanghelyo”—Fil. 1:27:
 - 1. Ang pagkausag kalag ug masamag-kalag alang sa buhat sa ebanghelyo mas lisod pa sa pagkausag espiritu aron makasinati ni Cristo; igsoon si Timoteo nga samag-kalag ni apostol Pablo—2:19-21, itandi sa v. 30.
 - 2. Nagkinahanglan ang pagkausag kalag nga, human ta ipanganak pag-usab diha sa atong espiritu, mopadayon pa gyod ta aron matransporma sa atong kalag—2 Cor. 3:18; Rom. 12:2.
 - 3. Kon wala ta mausa sa atong mga pagbati, mga hunahuna, ug mga desisyon, wala ta mausag kalag; basta wala ta mausag kalag, wala ta sa pakig-ambitay ngadto sa pagpauswag sa ebanghelyo, ug dili angay sa ebanghelyo ang paggawi nato.
 - 4. Kon nausa sa espiritu ug sa kalag ang tanang bahin sa iglesia, makakumbinsar, makabuntog, ug makadani kining pagkausaha, ug makasinati ug makapahimulos ta ni Cristo.
 - D. Posibleng makasinati ta ni Cristo nga wala makapahimulos Niya; ang problema dinhi naa sa atong kalag—sa atong hunahuna, pagbati, ug pagbuot; sama sa mga batang gipakaon nga wala ganahi sa ilang pagkaon, daghang panahon nga nakasinati ta ni Cristo nga wala makapahimulos Niya.
 - E. “Medyo nabalaka ko nga wala kaayo mo makapahimulos ni Cristo” (*The Collected Works of Witness Lee, 1978*, vol. 1, “The Experience of Christ,” p. 340); ang hinungdan nga daghan ang wala na makapahimulos ni Cristo mao ang problema

nila sa kalag; kon wala kaayo mo makapahimulos ni Cristo, nagpakita kini nga wala mo mausa sa kalag, wala madugtong sa kalag—Fil. 2:2.

II. Aron mausa ta sa kalag, maghunahuna gyod ta sa usa ka butang; ang *usa ka butang* sa Filipos nagpasabot sa subjectibong pagkaila, pagsinati, ug pagpahimulos kang Cristo; ang *usa ka butang* mao ang pagpursigir kang Cristo aron mabatonan, makuptan, ug mapanag-iya Siya—1:20-21; 2:2, 5; 3:7-14; 4:13:

- A. Aron makakinabuhi diha sa realidad sa Lawas ni Cristo, magpahimulos gyod ta ni Cristo pinaagi sa bug-os nga paghigugma Kaniya, ug aron mahigugma ta Niya, luwason gyod ang atong mga hunahuna sa pagkatig-a (2 Cor. 3:14), pagkabuta (4:4), pagkamasupilon (10:4-5), ug pagkadaot (11:2-3).
- B. Ipunting gyod ang atong panghunahuna sa labaw nga pagkamaayo sa pagkaila ni Cristo ug sa pagsinati ug pagpahimulos Kaniya; ang pagtagad og laing butang makapalahi man sa atong panghunahuna, ug tungod niana makamugnag mga panagsumpaki sa atong taliwala—1 Cor. 1:10; Fil. 3:8-9, 15; 4:2.
- C. Ang usa ka butang, ang bugtong-talagsaong butang, diha sa pahiuli sa Ginoo mao ang walay kataposang pamatigayon sa Dios nga si Cristo ang sentro ug uniberso—Col. 3:10-11:
 1. Ang usa ka butang nga tingban gyod sa pagtagad, hatagag gibug-aton, ug ipangalagad diha sa pahiuli sa Ginoo mao ang walay kataposang pamatigayon sa Dios—1 Tim. 1:3-4.
 2. Ang sulod sa walay kataposang pamatigayon sa Dios mao si Cristo; sa pagkatinuod, si Cristo mismo sa hingpit nga pagpangalagad Niya nga may tulo ka hugna mao ang diosnong pamatigayon (Juan 1:14; 1 Cor. 15:45b; Bug. 1:4; 3:1; 4:5; 5:6); tinguha sa Dios nga dunay putli ug bug-os nga pagpahiuli sa persona ni Cristo (Col. 1:17b, 18b; 2 Cor. 12:2a; 2:10; 3:3).
- D. Diha sa mga taga-Filipos naay panagsumpaki sa ilang panghunahuna (Fil. 4:2), nga nakasamok sa apostol; busa, gihangyo niya sila nga maghunahuna sa samang butang, bisan sa mao rang usa ka butang, aron mahingpit nila ang iyang kalipay (2:2):
 1. Ang paghunahunag laing butang gawas sa usa ka butang pagsupil man nato sa pamatigayon sa Dios; ang pamatigayon sa Dios mao nga maghunahuna ta sa usa ka butang; sa iglesiahonong kinabuhi tabangan gyod nato ang tanang balaan nga maghunahuna sa usa ka butang; ipunting gyod ang atong mga hunahuna sa pagpahimulos kang Cristo ug mapuno niini alang sa iglesiahonong kinabuhi, sa kinabuhi sa Lawas.
 2. Nagkalainlain ang gidak-on sa paghigugma sa mga magtutuo sa Filipos tungod sa nagkasumpaking panghunahuna nila (v. 2); dili managsama ang paghigugma nila sa tanang balaan nga mag-amping unta sa pagkausa; kon nadumalahan ug nabatokan na ang paghigugma nato sa mga balaan, nan, makapahimulos ta ni Cristo sa paghigugma nato sa mga balaan.
 3. Ang mausa sa kalag, madugtong sa kalag, dili lang aron makasinati ta ni Cristo kondili labi pa gyod aron makapahimulos ta Niya; aron makapahimulos ta ni Cristo, kinahanglan naa tay hustong kalag, “masigka-kalag” nga nausa sa mga kalag sa ubang balaan.

III. Aron mausa ta sa kalag, kinahanglan mausa ta ni Cristo diha sa Iyang mga pagbati, sa Iyang “mga bahin sa sulod,” nga nagtimaan sa Iyang pagbati sa sulod, malumong kaluoy, ug simpatiya—Fil. 1:8:

- A. Isip tawo, ang mga kasinatian ni Cristo sa Iyang mga bahin sa sulod naglakip sa Iyang gugma, tinguha, kalipay, ug pagbati—Sal. 16:3, 7 (tan-awa ang mga nota sa Hubad Pahiuli).
- B. Wala magkinabuhi si Pablo diha sa iyang natural nga tawo sa sulod; nagkinabuhi siya diha sa mga bahin sa sulod ni Cristo; kon buot tang mahimong mga tawo nga naa ni Cristo sa kasinatian gyod, kinahanglan nga naa ta sa Iyang mga bahin sa sulod, sa malumo ug maaghop nga mga pagbati Niya—Col. 3:12.
- C. Sa basahon sa Filemon duna tay hulagway sa kinabuhi sa Lawas nga gikinabuhi diha sa mga bahin sa sulod ni Cristo Jesus—vv. 7, 10-12, 20:
 - 1. Samtang nabilanggo si Onesimo sa Roma uban ni Pablo, naluwas siya pinaagi ni Pablo, nga naghigot niya nga “akong anak, nga gipanganak nako sa akong mga gapos”—v. 10.
 - 2. Sa dihang gipadalag balik ni Pablo si Onesimo dala ang iyang Sulat kang Filemon, niingon si Pablo nga, “Ako siyang [Onesimo] gipadala pagbalik kanimo—siya, sa ato pa, ang ako gyong kasingkasing”—v. 12.
 - 3. Nikuyog ni Onesimo ang sulodnong pagbati ug mga puangod ni Pablo sa pagadto niya ni Filemon; ang mga pulong [*ako*] *gyong kasingkasing* sa linetra sama ra sa *mga bahin sa sulod* sa Filipos 1:8, nga nagtimaan og sulodnong pagbati, kalumo sa kasingkasing, ug mga puangod—Col. 3:12.
- D. Nagkinabuhi si Pablo diha sa realidad sa Lawas ni Cristo sa paghimo niya sa mga pagbati ni Cristo nga kaugalingon niyang pagbati; nahimong pagbati niya alang sa Lawas ang pagbati ni Cristo alang sa Lawas; labi gyong gikinahanglan kini sa pagkinabuhi nato sa kinabuhi sa Lawas—2 Cor. 12:15.
- E. Kon dumilian nato ang atong kaugalingon ug makig-usa ta sa Lawas, dili gyod ta mabulag o maputol ba sa Lawas; ang kinabuhing ikinabuhi nato hingpit gyong kinabuhi sa Lawas, ug mabatonan sa Ginoo ang pagpadayag sa Iyang Lawas dinhi sa yuta karon—Mat. 16:24; Efe. 4:16.
- F. Labi tang magkinabuhi diha sa mga bahin sa sulod ni Cristo Jesus, maglabi sab kadako ang pagbati nato sa Lawas ni Cristo ug maglabi kalig-on ang pagbati nato alang sa Lawas ni Cristo—1 Cor. 12:26-27; Rom. 12:15.

IV. Aron mausa ta sa kalag, buhaton gyod nato ang kaugalingon natong kaluwasan sa pagbulig nato sa Dios nga nagpalagsik sa sulod, nga nagbuhat sa sulod nato sa “pagbuot ug sa pagbuhat alang sa Iyang gikahimut-an”—Fil. 2:12-13:

- A. Nagbuhat ta sa kaugalingon natong kaluwasan kay nagbuhat man ang Dios sa sulod nato; moingon tingali ta nga dili ta buot [mobuhat niini], apan gibuhat sa Dios ang pagbuot nganhi nato aron mabuhat ang Iyang gikahimut-an; naa sa sulod ang pagbuot, ug naa sa gawas ang pagbuhat.
- B. Gamiton gyod nato ang atong espiritu uban sa nabuntog ug nabanhawng pagbuot nato aron mopili nga mobuhat sa kaugalingon natong kaluwasan sa pagbulig nato sa Tulo-usang Dios nga nagpuyo sa sulod, nga nagbuhat sa sulod nato sa pagbuot alang sa Iyang gikahimut-an.
- C. Sa hulagway makita sa Awit sa Mga Awit 4:4 ang natranspormang pagbuot nato; niingon kining versiculoha nga ang “liog [sa mahigugmaong nagtinguha sa Ginoo] sama sa tore ni David, / Nga gitukod alang sa tipiganan sa mga hinagiban: / Gipamitay niini ang usa ka libo ka kalasag, / Ang tanang taming sa gamhanang mga tawo”:
 - 1. Naghigot ang Biblia sa mga naggawi segun sa ilang kaugalingong-pagbuot, sa mga gahiag-ulo ug mapagarbohon, mga tikig og liog (Isa. 3:16); busa, nag-

- pasabot sa pagbuot sa tawo ang liog; giisip sa Ginoo nga ang pagpasakop sa pagbuot sa tawo maoy labing matahom nga butang sa tawo.
2. Ang liog nga sama sa tore nagtimaan nga gilig-on sa Dios ang pagbuot sa matinguhaon hangtod nga wala na siya mahigugma sa kalibotan ug wala na maapektohi ni Satanas; hingpit na gyong nagpasakop ni David (nga nagtimaan ni Cristo) ang iyang pagbuot, ug nabihag na kini ni Cristo.
 3. Ang tipiganan sa mga hinagiban nga naa sulod sa tore nagtimaan sa kadaogan ni Cristo nga mag-amping sa pagbuot sa magtutuo aron dili mailog sa kaaway; alang sa pagpanalipod ang mga kalasag ug mga taming; ug nagpasabot og kusog ang gamhanang mga tawo.
 4. Sa lakbit-asoy, nagpakita ang Awit sa Mga Awit 4:4 nga andam magpasakop sa pagbuot ni Cristo ang magtutuo, ug sama kalig-on sa tore ang iyang pagbuot nga motuman sa Iyang kabubut-on; matukawon siyang nagbantay ug dili niya ipailog sa kaaway ang mapasakopon niyang pagbuot.
- D. Makita sa hulagway sa arkang gitukod ni Noe ang pagsinati nato ni Cristo nga atong kinabuhi sa pagsugot aron magbuhat sa kaugalingon natong kaluwasan; ang pagtukod sa arka pagtukod man sa praktikal ug naa-karon nga Cristo isip kaluwasan sa Dios sa kasinatian nato aron matukod ang Lawas ni Cristo nga hiniusang Cristo aron mahimuot ang Dios—Fil. 2:8, 12-13:
1. Ang gibuhay ug gisudlan ni Noe mao ang kaluwasan sa Dios, ang arka; naa gyod unta tay praktikal ug naa-karon nga Cristo nga kasudlan nato isip kaluwasan sa Dios.
 2. Hulagway ni Cristo ang arka, dili lang sa tinagsang Cristo kondili sa hiniusang Cristo sab, sa iglesia, nga mao ang Lawas ni Cristo ug ang bag-ong tawo—Gen. 6:14; 1 Cor. 12:12; Efe. 2:15-16; Col. 3:10-11.
 3. Sa pagtukod ug pagsulod ni Noe sa arka, dili lang nga naluwas siya sa paghukom sa Dios sa daotang kaliwatan pinaagi sa lunop kondili nagahin sab siya gikan niadtong kaliwatana ug nadala nadto sa bag-ong panahon—Gen. 8:13-19; 1 Ped. 3:20.
 4. Maingon man sab, sa pagtukod nato sa iglesia ug pagsulod nato sa iglesiahanong kinabuhi pinaagi sa pagtukod sa praktikal ug naa-karon nga Cristo nga kaluwasan sa Dios sa atong kasinatian, maluwas ta sa paghukom sa Dios sa daotang kaliwatan karon pinaagi sa dakong kasakitan (Mat. 24:37-39; Luc. 17:26-27; 1 Tes. 5:3); magahin gikan nianang kaliwatana (Luc. 21:36; Bug. 3:10); ug madala ngadto sa bag-ong panahon, sa panahon sa millennium.